



Jute statt Blasdig

Jute statt Blasdig so hett s friener ghaisse,
settsch nit alles in Abfall schmaisse.
Settsch s rysaiggle oder wider verwäände
und doo drmit kaini Ressource verschwäände.
Vierzig Joor speeter isch dä Spruch immer no woor,
unserer Umwält droot vom vyyle Blasdig e groossi Gfoor.
Blasdig isch braggtisch, hett Sinn und Zwägg,
aaber als Abfall bringsch en Joorhundert nimm ewägg

Alli myny Fläschli schwimme uff em See,
schwimme uff em See,
d Keepfli uss em Wasser, dr Räschte kaasch nit gsee.

In Aasie gheie sy alles hinters Huus,
wie s deert denn dryyluegg, isch e Gruus.
Wenn s denn räagnet, spielt s dä Drägg
aifach in näggschte Bach ewägg.
So goot s wyter in groosse Fluss,
deert hett s scho Blasdig im liberdruss
z letscht emänd landet alles im Meer
und Mentsch und Dier lyde drunter schweer.
Wettsch an sonere Beach go baade,
muesch bis zue de Gnei dur Blasdig waate.
D Fisch, die schlugge dr Blasdig aabe
und hänn denn derfiir e gfillte Maage.
Kaasch butze und räche solang de kaasch stoo,
am näggschte Moorge isch alles wider doo.

Alli myny Blasdigseggli schwimme uff em See,
schwimme uff em See,
zerfalle so in glaini Daili, denn frisst si e Hai in dr See.

Jetzt mainsch mr mache s besser in unserem Land,
vergiss es, d Schwyz bruucht Blasdig, es isch e Schand.
Europa, China und Afrika
verbiete Blasdig, die sinn voll draa.
Aaber bi uns wird alles was goot yyghillt
und mit däm Blasdig dr Mischtkiibel gfillt.
Eb Glepfer, Dommaate oder au Weggli,
alles hett e aiges Blasdigseggli.
Rysaiggled wäärde numme d Fläsche
und nit die vyyle Blasdigdäsche.
Dr Blasdig wird bi uns nit drennt,
sondern numme im Mischte verbrennt.

Alli myny Blasdig ghei ych in Müll dehai,
ghei ych in Müll dehai,
s goot alles in d Verbrennig und in d Luft goots CO zwai.

Wenn mr in Zuekunft Wattestäbli verbiete wäärde,
ganz eerlig, ych glaub nit das rettet d Äärde.
S isch fast alles uss Blasdig, dasch aifach doo,
im Zaanbiirschtli, Häändy und Piccoloo.
De kaasch nit alles mit Bio uuswäggsle
und nach Gebruuch in Komboscht häggsle.
Aaber wenn jeede Jute statt Blasdig wurd nää,
nit jeedem Riebli oder Epfel e Giggli gää,
Wenn de wider Glaas, Bapyyr bruuchs oder Holz,
alles rysaigglich mit vollem Stolz,
wenn statt Fläsche schlebbe, s Wasser spruudlich dehai,
alles meerfach bruuchs, s wäär e Droopfe uff e haisse Stai.
Mir Runzlebiergerfischli hätte s denn besser
Bim schwimme und dauche in unsere Gwässer.

Alli myny Jutesäggli schwimme uff em See,
schwimme uff em See
Verfuule und zerfalle aifach, denn kaasch si nimme gsee.